

求闕齊弟子記

求闕齋弟子記卷十二

東湖王定安譔

勦擒下

同治六年正月公發周家口 十五日至徐州 十九日接兩江總督篆

上諭會國藩既經接篆所有察吏籌餉及地方事宜均關緊要且金陵亦不可無勦望素著大員坐鎮著卽回任省城 鮑超擊任賴股匪於尹邏河大破之初賊由宜城流水溝循襄河上竄聞超駐軍樊城不敢正走乃斜出東竄棗陽劉銘傳遇之於冠山口敗之擒賊首郭包子王信等俘斬千餘人賊循河西折

竄安陸公弟國荃駐軍德安檄超率霆軍自樊城東下兩面夾擊超於正月朔拔隊前進途中阻雪行十餘日始至安陸之舊口適銘軍亦自宜城抵下洋港謀知賊聚尹澧河超與銘傳函約分道兜勦霆軍由西而東銘軍由北而南十五日嚮明銘軍先至尹澧河見賊隊紮對岸遂將輜重約退銘傳親督隊過河賊分馬步來迎欲薄我軍於水濱戰甫接賊以奇兵躡我後銘傳恐後路輜重有失抽隊回顧賊乘我軍未渡大股麋至我軍驚亂李錫珍唐殿魁及營官田履安吳維章咸死之軍士歿者六百餘人銘傳且戰且退時鮑超率大隊東行久不見銘軍正疑慮聞望見前路輟亂旗靡駝馬滿野知銘軍敗績飭各營列

隊與賊隔河而軍任柱賴文光素憚超名拚死分路迎戰萬馬
潮湧超令將士以劈山礮連環轟擊賊馬奔騰而上盡爲所踏
天色嚮晚賊漸不支超指揮衆軍如牆而進賊大披靡人馬自
踐踏陣斃萬數千人我軍乘勝渡河追十餘里日已夕矣銘傳
亦回軍猛戰所失騾馬軍械盡數奪回超令將士稍息期詰朝
滅賊詎賊於四鼓銜枚偷遁直趨白口超急率軍緊躡賊不敢
喘息乃北奔超乘勝追殺五晝夜連捷於楊家峯拖船埠豐樂
河等處斬馘數萬級生擒四千餘名救出難民二萬餘衆奪獲
橐駝騾馬槍械不計其數任柱賴文光狼狽竄入河南境
上諭鮑超勇於立功所向克敵實爲奮勉惟賊數不下十萬鮑

超旣與賊相持自不能舍而之他該逆現由泌陽桐柏竄去著
會國藩李鴻章酌度軍情如任賴股匪鮑超一軍果能蕝事卽
令該提督暫紮鄂豫之交先將此股辦竣再令西征 劉松山
張錫嶸合擊張總愚於西安雨花寨錫嶸死之錫嶸靈壁人由
編修任雲南學政議禮望吏議回籍公令募敬字三營欲儲爲
西北之用會劉松山援秦與之俱西初六日錫嶸率百餘卒陷
陣負傷殞命事聞奉

旨贈侍講學士從優議卹 任柱賴汶光竄唐縣豫軍宋慶追
至桐柏之平地鎮敗之乃由長臺關雙井店犯羅山又竄光山
之陳家棚潑波河等處

詔授李鴻章爲湖廣總督李瀚章調江蘇巡撫暫署湖廣總督
二月初三日李鴻章自徐州拔營赴周家口督師 任柱賴
汝光竄麻城遂竄蕲水廣濟黃梅邊馬擾及宿松公弟國荃遣
彭毓橘分路跟剿李鴻章遣李昭慶由光商進六安會劉秉璋
分投攔擊又令楊鼎勳馳往光州扼賊北竄之路

上諭李鴻章進駐周家口曾國荃擬駐黃州著卽督飭諸軍認
眞遏截並著英翰李鶴年各派勁旅合力兜裹使該逆不得逞
志淮河下游水勢寬深著曾國藩李鴻章多調礮船節節巡防
時浙江提督鮑超因傷病舉發奏請開缺調理

朝旨慰留飭由南陽取道信羅至光固防剿 十五日夜劉松

山攻破銀渠金渠賊壘張總愚走渭北 十六日公發徐州至韓莊登舟三十日次揚州查看形勢以揚州爲裏下河屏障不可無重兵扼守乃飭道員吳毓蘭率華字營駐防並函商李鴻章永不調此軍 彭毓橘擊任賴股匪於蘄水敗績死之任賴等逆窺伺皖邊適劉秉璋周盛波等由羅田英山馳至太湖乃回竄鄂境十八日彭毓橘與葛承霖等遇賊蘄水六神港大戰陣亡毓橘湘鄉人從公弟國荃攻克金陵厯著戰功洵保至記名布政使湘軍久勝之餘輕於犯險深入致爲賊誤於是捻勢西趨蔓延黃陂黃岡腹地有回竄德安之意李鴻章奏催鮑超力疾援鄂奉

旨該提督素稱勇往卽力疾由德安馳赴黃州迎勦毋失機會
並著曾國藩剴切開示勿任初終異轍以保勦名而副期望
公疏稱臣接李鴻章曾國荃來函均令鮑超由樊城會師東下
惟該提督兩次奏請開缺不知傷病舉發近狀若何臣已馳函
再三勸誠勉其力疾進兵矣 三月初一日劉松山擊賊於郿
縣大破之松山自攻破銀渠金渠進軍郿縣偵知張總愚與狽
匪合股勢益蔓延遂分隊迎擊踏平沿河賊巢數十壘奪回村
莊十餘處公疏稱劉松山一軍自援秦後連次獲勝似於戰事
尙有把握惟擒匪之狡猾狽匪之齊心均屬悍寇而進兵愈遠
運精愈難孤軍深入尤不放心臣屢囑其暫圖穩慎俟各軍四

集別有後繼之師再爲猛攻之計臣謹遵

諭旨力籌軍餉源源接濟俾前敵不至匱乏軍心藉以維持或可補救愆尤 初六日公抵金陵節署居民焚香跪道以迎詔授陝甘總督左宗棠爲欽差大臣時任賴股匪由黃陂西竄淮軍霆軍尙未追至宗棠行次湖北疏請在德安暫駐俟各軍赴鄂再行入陝

上諭左宗棠擬在德安暫停數日視賊所向再定行止尙能力顧大局不分畛域如賊由白口西竄著卽督軍會剿以收夾擊之効惟秦中捻回交訐喬松年布置未能裕如如淮霆各軍趕到左宗棠仍卽入關妥爲調度 任柱賴汝光竄鍾祥之曰亡

京山之尹隆河遂由郢東驛洋梓一帶上犯二十五日過安陸
府擾及流水溝豐樂河等處二十七日至東陽之宋家集 四
月初一日劉銘傳督軍至游河店時賊竄鴈山一帶邊馬繞至
桐柏之四十里冲初二日賊竄黃土關大廟畝邊馬擾及譚家
河西雙河距信陽州東南約五十里初五日周盛波擊賊於台
子畝提督劉啟福歿於陣初六日劉銘傳追賊至平靖關賊竄
應山東北王永勝董鳳高復敗之於李店賊乘夜竄孝感之小
河溪初七日賊竄黃安之河口鎮初十日劉秉璋楊鼎勳敗賊
於長山寨賊竄宋埠十一日劉銘傳敗賊於黃安之紫屏鋪追
三十餘里陣斃數百人救出難民千餘人賊畏兵遠避遂回竄

安陸初任賴等逆在鄂中屢勝之後勢甚猖獗此次由黃安東趨卽欲下竄皖豫各軍分路截擊劉銘傳攔頭痛剿始折而西捷聞奉

旨獎敘有差 公疏稱臣回任以後通計餉需欸項一年入數較之出數不敷甚鉅勦擒之師如劉松山一軍例支月餉六萬兩入奏以後因添發米價運費將近七萬今年尙僅解去兩關該軍孤懸西陲日與捻回兩寇接戰深恐餉項不繼或生他變淮勇諸軍人數較多遠軍湘軍上年均發滿餉淮勇僅發九關臣寸心抱歉久欲畧爲添增而計無所出近則蘇局釐金大減滬釐亦遠不如前鹽務則久無起色似此情形並不能足九關

之數目下三四兩關卽難籌齊夙夜憂懼深恐無以維繫軍心
捻匪馳突無定臣常謂北以黃河防務爲主東以運河防務爲
主南以大江防務爲主能守定此數處大局尙不至決裂而長
江上下數千里僅恃水師絕少陸兵北岸沿江最要郡縣安慶
只有兩營揚州亦僅兩營滁州和州無爲州並無一兵臣思添
練數營布置各城爲思患預防之計亦以無款可籌迄未舉行
又如添造輪船運河堤工皆萬不容緩之事查江海關洋稅一
項自扣款結清以後提解四成另款存儲部庫本係奏定專撥
之款未敢動用絲毫惟現當餉項萬緊合無仰懇

天恩俯準將洋稅解部之四成酌留二成以一成爲專造輪船

之用以一成酌濟淮軍及添兵等事俟輪船就緒各軍餉裕仍按四成全數解部以符初議奉

旨允行 時浙江提督鮑超在營患病遣弁詣公白事極陳疾勢危劇籲請開缺回蜀調理公以霆軍轉戰東南所向無敵其部將婁雲慶宋國永素爲超倚重將擇一人接統其衆而偏裨多毀婁右宋公慮國永柔懦力不足以制衆而雲慶又爲衆所謗驟膺統將且激變乃盡撤之令雲慶卽其衆另募一軍仿霆軍戰法繩以湘軍紀律因疏言鮑超因病請開缺奉

旨報可 任柱賴汝光之竄安陸也游弋於雲夢應城日口天門之間值天久不雨湖河盡涸我軍人馬憊甚賊亦沿途飢散

十九日賊由京山竄郢東洋梓適寔軍宋國永山隨州西向二十日遇賊於關山襲破賊館斬數百級二十二日賊由宋家集竄新野南陽邊馬擾及鎮平鄧州境內時豫東新麥登場賊攻破民寨網載場麥駸駸有由浙川荆子關入陝之意適豫軍由南陽進擊銘軍由聚陽襄陽躡其後二十九日劉銘傳追賊至鄧州之趙家集賊棄館遁善慶陳振邦率馬隊敗之於白龍廟擒斬賊首李紅山朱五等追二十餘里至鎮平縣之馬莊賊向東南而逸 張總愚竄入北山將由保德州渡河犯晉時陳湜駐蒲州論者謂保德去蒲州遼遠恐於河津以北有鞭長莫及之勢總兵蔣臨熙及道員恆祐兵力甚單且多未經行陣若賊

由北路過河竄入晉省宣大均屬可危奉

旨飭左宗棠趙長齡陳湜認真辦理河防 五月公疏稱蒙亳

等處本係捻匪老巢從前募民投入捻中則可出可歸投入營中則時降時叛淆亂黑白莫此爲甚前年查辦之初不得不濟之以猛使人知在外充捻者無可容之鄉里無可居之室廬即使混跡軍營藏身自固亦必立賞重典不稍姑容迨匪黨知所畏憚民賊判爲兩途又須濟之以寬俾愚民有自新之機而良民有更生之樂現在查圩一事辦有成效即可歸併地方官辦理嗣後亳州宿州蒙城阜陽四處清查民圩應由各該州縣仿照成法認真辦理查獲積捻卽由該印官通稟批飭正法由安

檄撫臣英翰隨時具奏以一事權其上年八月起至本年四月止擒斬積擒一百五十二名相應續開清單恭呈

御覽 任柱賴汝光竄唐縣肆擾舞葉臨穎之交劉銘傳連敗之遂竄許州豫軍張曜剿擊之賊竄洧川尉氏中牟時山東鄆城梁山寨有土匪勾賊任賴等逆遂輟入陝之謀日夜馳數百里勢如竄急初七日由朱仙鎮畧及陳留蘭考初八日卽入山東曹縣境初十日定陶城武徧地賊氛十一日犯鉅野時賊久擾鄆中運防戍卒多懈又值天旱水涸人馬可涉公因疏稱山東防務以運河爲最要去年逆蹤三次竄撲均經苦戰擊退固由防務之嚴密亦恃水勢爲屏蔽本年天氣亢旱運河日涸水

師無可展施旱兵尙嫌單弱賊如悉數猛撲恐上年之潞河修牆前功盡棄此其可慮者也奉

旨著李鴻章督運防水陸各軍妥籌策應並飭公令黃翼升率礮船赴清江徐州嚴密巡防 十二日任在賴汶光合梁山土匪攻陷戴廟運河隄牆擄船東濟遂犯泰安濟南戒嚴登萊青三郡皆震 李鴻章由周家口移駐歸德督師

上諭捻股搶過運河在防將士不能爲一日之守致誤大局實堪痛恨現在賊蹤有東擾登萊青之勢李鴻章當懍遵前旨迅飭劉銘傳潘鼎新速赴濟泰等處該大臣現雖移駐歸德著再擇要就近調度毋諉爲賊蹤飄忽漫無籌畫自干罪戾 公聞

運河潰防慮言路糾彈貽書李鴻章以忍辱負重相勉且云僕前歲受任未滿三月

廷旨有因循疲玩之責凡遇棘手之際請從耐煩二字痛下工夫講求紀律禁止騷擾卽耐煩中之第一義也 任桂賴汝光竄新城遂竄平度州山東巡撫丁寶楨邀擊於馬蘭堡敗之奪獲賊馬數百匹賊向東北奔逸 李鴻章移駐濟甯督師鴻章用劉銘傳倒守運河之策因公所修東岸隄牆移置西岸又欲防守膠萊河殲賊於海隅膠萊河僅三百里較運河千里爲功較易而直隸總督劉長佑安徽巡撫英翰相繼上疏皆主守運河與鴻章所論畧同長佑疏曰捻匪肇亂十餘年流毒四五省

非戰陣之不力防禦之不嚴也有限之兵力日疲於奔馳無險之地形莫禦其衝突該匪不占城池不齎資糧乘虛飽掠數日千里加以游民叛勇勾結依附凶焰日熾至於燎原近聞該匪擾及青州濱海完善之區恣其擄掠藉申喘息大兵踵至不冒險北犯卽乘隙南奔矣爲今之計惟有集數省之兵嚴扼運河遏賊回竄然後以節制之師由西南節節逼近駢之於一隅該匪渡黃不能浮海不得必輾轉就斃於青齊之間查運河自山東至江蘇幾及千里擬請飭河南湖北江蘇安徽各調兵萬人合堵運河濟甯以南由江皖湖北分段堵守濟甯以北由河南直隸分段堵守何處有失惟何省督撫是問至進勦之兵應由

李鴻章與丁寶楨就近調度但能逼賊東北不令再擾西南數月之間必可蕩事英翰疏曰賊已深入東境若驅之登萊二府以重兵分守膠萊要隘逼賊入海可收盡殲之効事易而功速似爲上策北守新黃河南守運河合湘淮東兵力與賊縱橫追逐使之一日不得喘息我軍日增賊勢日蹙雖稍需時日終可告成此亦中策若令其飽掠而回皖豫仍事尾追兵疲賊張斷難制其死命此則策之下者李鴻章用劉銘傳之議商調皖軍進赴運河西岸會合逼賊與奴才前議相合上年劉銘傳過潁州奴才會與籌商黃河水涸緊逼直省未敢遽建此議今大雨時行黃河天險賊必不得北竄奴才何敢畫疆自守卽檄張得

勝三營星夜馳赴運河西岸分段駐守以黃秉鈞八營從宿遷
向上游扼紮張得勝九營從灘上起向下游扼紮程文炳步軍
八營駐兩軍間接應分立營壘認真設守而以勇隊五營往來
巡哨奴才擬六月初旬由潁州取道靈泗前赴運河察看若賊
入我穀中當往來潁宿之間妥籌調度

上諭劉長佑英翰所籌均不爲無見著曾國藩及各該督撫就
現有兵力妥速籌辦 六月英翰赴宿遷布置運防令張得勝
等尅期築牆自仰化集以東至海濱分段扼守 任柱賴汝光
分竄甯陽萊蕪青石關等處由青州趨登萊兩郡初九日自萊
陽北趨招遠黃縣境內全股聚海滋李鴻章丁寶楨會軍扼膠

萊河以感之膠萊河者元至正間所開新河以通漕運而避海道之險者也其水橫亘南北南口曰麻灣北口曰海倉延袤二百八十餘里海倉口外有沙灘七八十里不能築牆水淺沙洶人馬可涉而新河迤西三十里有濰河入海處水勢頗深乃議從新河西築牆橫紮至濰河東岸復就濰河築牆以濱於海自新河南至大成寺一百一十里令劉銘傳守之自大成寺至吳家閘約六十里令董鳳高沈宏富守之自吳家閘至麻灣口約八十里丁寶楨派東軍守之俱於西岸增修長牆自新河至濰河東岸濰州新守之其濰河西自夏店至海口水深泥淖令東軍分守以補其隙又調王永勝及豫軍宋慶由運防馳赴膠萊

河與劉銘傳相機策應其東平宿遷兩防令李昭慶及豫軍張曜替守以固運防惟濰河西辛家莊北至海尙空五六十里劉銘傳潘鼎新派馬隊六營沿河巡哨是時賊已深入海曲膠萊守禦漸就緒咸謂成功尅期可俟公獨慮防軍難恃度賊必突膠萊貽書李鴻章論倒守運河之策畧云捻匪猛撲膠萊河沿勢必竄出仍須倒守運河運河地段太長從前防守東岸則自桃源以下僅守成子河之橫圩二十餘里卽以直接洪澤湖今日倒守西岸則自桃源以下直至海濱添出五百餘里實無許多兵力可以分防就目前而論六塘河寬水深自仰化集而下卽可無須陸兵防守就將來而論黃河以北之六塘河九月必

將枯涸黃河以南之射陽河

卽射陽縣

十月亦將枯涸是桃源以下

五百餘里皆須陸兵分段設防安得此數萬防兵且卽使阜甯以下之射陽湖不甚枯涸而自桃源至清江百二十里漕帥部下兵僅數千已覺不敷分布自清江至淮安五十里自淮安至阜甯百六十里又豈僅王可陞之五營歐陽利見之三四營所能分布此二百一十里乎閣下於桃源下至海濱五百餘里籌算似未周詳卽桃源上幼泉以十七營而防百七十里浙軍以六營而防五十里水涸時均嫌太單國藩反覆計算倒守運河之局兵數不敷甚鉅而自清江至阜甯二百一十里陽王兩鎮九營尤爲不敷分布此鄙人分內應設之防更不能不熟商者

也請閣下再加以審審如果膠萊河之防被賊衝破則須預派勁兵助黃王歐陽防守裏下河門戶倘待六塘河旣涸之時乃議此著恐緩不及事矣 七月二十日任柱賴汝光撲灘河防軍敗績賊越河西竄時淮軍諸將領皆稱膠萊河防已固李鴻章將由濟甯取道甯陽肥城長清濟南青州以達膠萊賊知我軍將蹙之海隅以圖聚殲初一日由卽墨撲麻灣丁寶楨督東軍進擊敗之遂折竄平度卽墨之交往來窺伺冀犯銘鼎兩軍汎地不克初八日竄萊州附近十六日五鼓賊馬步大至撲豫軍所守新河地段宋慶擊卻之賊謀知膠萊河守禦嚴密乃圖渡灘河二十日辰刻由海神廟北數十里外海灘撲渡時東軍

王心安守濰河營壘初成河牆未築賊一擁過河我軍抵禦不及遂全股漏網而逸距鼎軍汎地四十餘里次日鼎軍銘軍追至濰縣賊竄昌樂二十三日分股由安邱臨朐南竄將由沂莒以窺江淮事聞奉

上諭丁寶楨奏擒匪竄過濰河覽奏曷勝憤懣擒股初竄登萊卽諭李鴻章感諸海隅復慮丁寶楨呼應不靈疊經諭令該大臣馳赴前敵親臨調度乃該大臣始終遷延以致潘鼎新分防汎地屢次改移貽誤大局盡棄前功已明降諭旨將李鴻章潘鼎新交部議處並將丁寶楨摘去頂戴革職留任以示薄懲矣扼守膠萊之策竟成畫餅黃運兩防雖據該大臣奏稱分布穩

固若盡如前敵各軍恐亦未可深恃賊在登萊旣已遂其飽掠此番全股出犯其氣正銳倘令逸出東境大局不堪設想李鴻章自督辦以來會未稍挫凶鋒糜餉殃民厥咎甚重此時惟當趕緊抽調各軍分路剿勦以贖前愆並著會國藩劉長佑英翰李鶴年各飭所派防軍認真守禦賊由何路竄出卽治何路將領以失律之罪 任柱賴汝光竄贛榆青口復由青口北竄郊城蘭山境適李鴻章行次沂州賊復折而南奔

上諭蘇境運河自宿遷卽化集至桃源清淮二百餘里尙無長牆六塘河水勢充足兵力亦不可恃李鴻章已分派各軍前護運防並擬親駐臺莊就近調度此時若能扼之河干就地殄滅

固屬勝算該大臣曾奏運防斷無把握倘泥於前說將得力之
兵分赴河防勢必任賊肆竄竟無勦擊之師河道地方遼濶設
防本自不易秋後水落更無可恃賊果一意渡運難保必能堵
截該大臣總統師干必當統籌全局力圖滅賊之策何得隨時
敷衍冀圖塞責仍著迅派得力之師實力扼勦以期迅速肅事
自膠萊潰防

朝議疑運防亦不可守而山東安徽各路將帥以河防失事均
咎淮軍李鴻章屢奉

嚴旨詰責公貽書慰勉畧云事機不順之際要當寬以居之靜
以待之不可過於焦急僕初接辦捻匪只認防勦十二府州實

以江南餉力淮湘兵力鄱人才力三者不過如此而止厥後京師謗言紛起僕亦自亂其例自遷其說迄無一成今當艱危之局望將躁急鬱迫之懷掃除淨盡將來或仍理十二屬舊說與各省分汛辦理或可稍輕責備乎 曾國荃遣鄂軍譚仁芳劉維楨助守運河分管靳口至亨濟閘防務 丁寶楨督東軍楊飛熊駐沂州堵賊犯運 八月十一日李鴻章至臺莊督師劉銘傳牛師韓敗賊於郟城賴榆等處 任賴股匪犯沐陽劉銘傳擊走之遂犯莊家灘姚廣武復敗之 賊撲宿遷運河牛師韓黃秉鈞擊卻之 賊撲老劉澗姚廣武復截擊敗之賊移而北趨 時六塘河淺處褰裳可涉浙江派來助守之三千人

至是始到防賊全股撲犯運河

朝廷頗以清淮兵單爲慮適英翰調兵萬人協防所部牛師韓黃秉鈞等奮力擊退運防賴以完固 潘鼎新連敗賊於邳州邳城等處 九月初四日潘鼎新敗賊於海州阿湖鎮初八日劉銘傳敗賊於王堰牛山等處任賴等普竄贛榆劉銘傳潘鼎新山邳郊躡追十三日賊竄蘭陵十四日入嶧縣山中溫德勒克西以馬隊兜勦賊奔滕縣將趨濟甯撲運防值黃水盛漲沈口戴廟南北岸一片汪洋運河上游賊不能偷渡李鴻章回駐濟甯嚴檄各軍扼守下游二十三日賊遂竄泰安二十五日由蒙陰南遁 李鴻章檄提督郭松林統武毅軍時

朝廷趣戰甚急英翰以順河集之戰未見淮軍疏劾李鴻章觀望不進而丁寶楨亦具疏彈劾

寄諭有意存忌刻縱賊誤事之責鴻章上疏自剖畧云英翰遠在穎郡繫念運防派程文炳等出境助勦臣與該撫交好有年公義私情均深敬佩何至稍存忌刻縱賊觀望爲此悖義昧良之舉至丁寶楨以濰河前事謂臣徇私譏咎倒置是非仰蒙

聖明詳切訓誡臣敢不懷遵臣與丁寶楨本無嫌怨自夏間賊入東後彼卽欲逐賊出境固身任地方之常情惟臣專辦勦擒必思所以制賊之方扼膠萊爲上策其次則感之運河以東無論能否辦到勢固不能不辦臣擬出三大支爲合力兜勦之計

但擒逆人馬衆多我軍須加整練不能不稍待時日於是鴻章
憂瘁致疾公因答書勉之曰來緘謂中外倚鄙人爲砥柱僕實
視淮軍與公爲轉移淮軍利公安僕則砥柱也淮軍鈍公危僕
則累卵也 十月公弟國荃以舊疾復發疏請開湖北巡撫之
缺奉

旨回籍調理以郭柏蔭爲湖北巡撫 任賴股匪竄青州淄川
長山章邱等處遂趨齊東之馬莊伺搶民船將渡河水師擊走
之 十七日劉銘傳擊賊於濰縣之松樹山敗之陣斬二千餘
人生擒賊首潘債張斯潘德楊三注等奪獲騾馬一千六百餘
匹賊勢窘繞向安邱東北由高密諸城一路南竄 二十四日

劉銘傳善慶擊賊於賴榆大破之僞魯王任柱伏誅初任柱之敗於安邱也賊黨潘貴升密款於銘傳請殺任逆自效銘傳命隸陳鳳樓馬隊授貴升千總職約狙擊任逆獎二萬金二十二日銘傳追賊至日照任逆耳際受槍傷逕奔江蘇贛榆縣境銘傳同善慶躡及之二十四日未刻銘傳率衆抵城偵知賊豫設伏城東誘我乃派善慶溫德勒克西由城東進陳鳳樓陳振邦等由城西進陳鳳樓等甫過西關遇牛賴率馬步數千蜂擁而來戰數合騎賊稍卻步賊持矛夾進唐定奎劉盛休等揮戈出迎任逆率悍黨橫衝而來銘傳乃親與牛賴敵而令善慶當任逆任逆殊死鬪賊黨皆百戰之餘猛鷲異常善慶令騎兵下馬

結陣拒戰而以洋鎗排擊賊死亡相藉猶蟻附而進忽黃霧四塞昏不見人銘傳派丁壽昌滕學義劉克仁等乘霧由城北繞出賊後以分賊勢時牛遂子已爲唐定奎等擊走賴汝光亦敗遁我軍皆萃於任逆俄頃劉克仁丁壽昌等已襲其後賊陣始擾銘傳善慶督馬步衝殺煙霧之中忽聞大聲呼曰任柱中鎗斃矣賊衆大奔蓋降將潘貴升與哨官鄧長安效賊旗幟乘任逆不備施鎗洞其腰脅賊衆見之始驚潰也任柱原名化邦亳州人家饒於財少桀驁喜從捻酋游其父屢誡不悛集族人笞責之柱肆言曰吾身父所畀父可管束吾性天所畀父豈能管束哉遂從捻不歸以迄於亡柱受粵逆洪秀全僞封僭稱魯王

凶猛善戰張總愚李允等皆不及剽掠十餘年荼毒數省及其死遠近稱快柱旣誅餘股推賴汝光爲首而賊勢衰不復振矣上諭任逆爲著名悍賊現在兗渠授首賊膽愈寒潘鼎新唐仁廉已先後由莒州日照向南兗追著卽倍道星馳與劉銘傳前後夾擊務須乘此銳氣就地聚殲毋任再行挺走潘貴升鎗斃任逆勇往可嘉所有賞給該千總銀二萬兩著曾國藩迅卽撥給以示鼓勵 二十八日潘鼎新敗賴汝光於海州之上莊斬賊首任金保獲賊級二千僞內五營頭目李宗詩率馬賊五百餘名降 十一月初一日賴汝光竄諸城初四日潘鼎新敗賊於兩城集初六日鼎軍過留武關賊竄高密初七日鼎軍至油

海賊竄昌邑初八九日鼎軍至北蒙賊又折向濰縣 初十日
劉銘傳擊賊於濰縣壽光大敗之先是銘傳恐賊竄青濟黃防
喫緊連夜由安邱間道馳抵濰縣賊至安垺鎮不虞我軍先至
大驚時已薄暮潛赴各村藏匿銘傳派陳振邦馬隊丁壽昌步
隊由東路兜擊親督劉克仁唐定奎步隊徐邦道陳鳳樓馬隊
由正北進善慶溫德勒克西由西北進唐仁廉由正西繞向東
擊約五鼓在安垺鎮會兵陳振邦先至襲破賊館十餘處賊倉
皇迎戰善慶等馬隊繼之劉克仁唐定奎衝入賊中唐仁廉亦
於正西奮擊數十里間鎗火相接軍威大振羣賊四散銘傳乘
月色跟追至壽光之仇家莊天將明矣生擒二千餘人次日我

軍乘勝搜殺自卯至午斬馘甚衆收降賊首盧金輝鈕洪章尹
已端黃文隆四股共二千餘人 十二日郭松林楊鼎勳敗賊
於杞城 二十日潘鼎新唐仁廉敗賊於膠州小南溝陣斃僞
奏王賴世龍賊目張向春趙林高率六百餘人來降 二十九
日劉銘傳郭松林楊鼎勳擊賊於壽光瀰河大破之初銘傳松
林鼎勳等盡棄輜重裹乾糧追賊至臨淄牛山偵知賊由東北
濱海南竄爲瀰河所阻無路可遁期與我軍決一死戰大股盤
踞壽光王胡城未動銘軍由左路進松林由右路進而令馬隊
先行次日至北洋河卽見賊馬數十團從南岸隨潮而至善慶
溫德勒克西等率馬隊分三路迎擊縱橫盪決連戰五六合我

軍步隊漸集連放炸礮轟破馬賊數團賊且戰且退追至鳳皇
臺遙見步隊排列十餘里長矛林立馬賊亦拚死回拒正在相
持間逆酋牛遂子何成等忽率白旗步賊犯我左路銘傳派劉
克仁唐定奎滕學義劉盛休等迎擊自率丁壽昌丁達才劉盛
瑞等繼之鎗礮雨下前賊死傷枕藉後者猶抵死猛撲劉克仁
唐定奎首先陷陣各刃悍賊數名羣逆氣奪滕學義等乘勢齊
集賊紛紛潰敗當牛遂子之撲犯左路也偽道王賴汝光僞王
宗任三厥等亦率藍旗步賊分數支犯我右路松林揮令李長
樂陳飛熊王平西張正全高占彪唐宏成等分投迎敵鏖戰兩
時之久賊猶猛進不退楊鼎勳督同王萬創等繼進策應松林

復親率奮勇小隊及後軍三營由周家寨抄至賊後長矛攢刺短刀相接賊腹背受敵全拋器械而逃松林親督諸軍追殺五十餘里陣斬及淹斃者不計其數沿途尸如山積瀾河水爲斷流時壽光城北各民圩皆從壁上觀見官軍大勝出圩助殺殘賊於是瀾河以東與昌維各民圩皆有擒斬而趙家堯河莊文生楊錫齡等呈報殲僞列王徐昌先僞首王范汝增二名獲其木印二顆壽光縣知縣吳樹聲至瀾河查驗賊尸凡二萬餘具皆髮長尺餘無一有鬚者是役也生擒萬餘人奪獲騾馬二萬匹任柱之兄任定死於瀾河賴汝光率千餘騎覓河南遁幾斃於水任柱大股殲滅幾盡賊不復能軍矣 十二月賴汝光率

餘匪南入江蘇境初八日搶渡六塘河衝過二千餘人餘衆分
途四竄總兵王有明等邀擊於丁家嘴朱林渡降賊千人初
九日劉秉璋軍敗賊於清江初十日黃翼升李昭慶追賊至
淮城之平橋賊正欲搶渡運河劉秉璋姚廣武馬隊適至賊循
高寶河堤下竄而劉銘傳等由山東疾馳六百里至清江銘傳
部將陳振邦會程文炳牛師韓遇賊流陽賊首任根柱率百餘
人降賴汝光由邵伯趨揚州十一日吳毓蘭擒偽遵王賴
汝光於揚州瓦窰鋪毓蘭卽公前過揚州所設防軍也賴汝光
由邵伯竄至灣頭毓蘭率隊迎擊遇賊瓦窰鋪雨夜昏黑賊騎
數百拚死拒戰五更時賊縱火燒屋志在逃逸我軍冒雨直前

毓蘭於火光中望見一騎手執黃旗指揮知爲逆首連放數鎗
賊馬倒斃遂生擒賴汝光餘匪百餘騎由六合天長竄至盱眙
雍髮而散僞魏王李允逆首牛遂子任三厥率賊黨二百餘名
詣前江南提督李世忠降賴汝光本粵賊悍黨僞封遵王同治
二年攻陷陝西漢中府時楚軍圍金陵垂克僞天王洪秀全馳
書告急三年正月元旦汝光偕僞扶王陳得才棄漢中東竄盤
旋楚皖之交爲官軍所阻不得達得才旣誅遂與捻匪任柱合
股冀借捻勢竄皖中分我兵勢解金陵圍六月曾國荃克金陵
餘賊勢益衰耗汝光遂變而爲捻汝光善謀任柱善戰二人者
狼狽相依凶悍視粵賊爲甚被擒時年四十一鞠訊時自書親

供于餘言述粵賊事甚詳凌遲處死傳首以徇李允牛遂子任三厥罪大惡極乞降非其本意駢誅之東捻平於是

詔錄公籌餉之功加一雲騎尉世職李鴻章加一騎都尉世職劉銘傳賞給三等輕車都尉善慶郭松林楊鼎勳賞給騎都尉潘鼎新賞給頭品頂戴黃翼升劉秉璋賞給白玉翎管大小荷包火鑲白玉柄小刀其餘各員均給獎有差

同治七年正月西捻張總愚竄畿南

詔李鴻章赴河北會剿先是張總愚盤踞陝西

朝旨命左宗棠以剿回之師分軍剿捻六年六月宗棠率師入潼關與山西按察使陳湜籌定防河之策時張總愚渡渭北盤

旋蒲富高渭之間宗棠遣劉松山郭寶昌黃鼎會擊破之七月
松山寶昌李祥和等敗賊於渭南縣之新莊馬家堡賊竄臨潼
三原咸陽一帶劉效忠追擊敗之賊竄興平八月宗棠移駐臨
潼賊由興平三家莊渡渭而北黃鼎乘其半渡截剿賊遁回北
岸復由臨涇渡涇而東值大雨阻水我軍不得進九月宗棠遣
松山等進軍富平劉典高連陞等進軍相橋康橋一帶賊由蒲
城竄入北山十月宗棠遣軍敗賊於洛川賊犯鄜州知州田景
瀛登陴固守劉厚基入城助之賊乃退遂犯甘泉厚基復擊卻
之賊犯宜川劉松山等率師跟追次洛川復遇回匪大至李祥
和戰歿二十二日賊陷延州二十七日陷綏德州十一月劉松

山郭寶昌等抵青洞縣十一日克綏德州二十七日賊由宜川之龍王廟渡黃河犯山西連陷吉州鄉甯兩城南擾河津逼近解州運城宗棠上疏自劾奉

旨交部議處宗棠親率劉松山郭寶昌等軍入晉追賊二十六日克吉州二十七日克鄉甯縣稷山解圍十二月初四日松山破賊於洪洞賊竄平陽初九日賊由垣曲縣竄河南濟源縣犯衛輝府宗棠遣喜昌全福安住偕劉松山郭寶昌馬步各軍由懷慶趨彰德以嚮直隸七年正月賊由臨漳內黃渡漳河大股由平鄉雞澤南和直趨畿輔遂由邯鄲順德犯定州保定戒嚴上諭官文奏賊蹤竄踞省城西南各軍繞前扼剿一摺據衍秀

並神機營探稱該逆大股於十三日竄至距易州三十里地方是賊踪已向西北奔竄何以官文奏稱大股尙盤踞距保定省城三十里之涇陽驛恐所探未能確實官文卽出省馳赴易涿一帶調度李鴻章卽著馳赴近京一帶相機剿擊左宗棠著卽取道固關兼程前赴保定以北督剿 張總愚犯雄縣京師戒嚴官文左宗棠李鴻章俱奉

嚴旨詰責 山東巡撫丁寶楨帶兵入衛抵固安賊南竄博野安平寶楨移師雄縣躡之 二十二日左宗棠師次獲鹿 劉松山敗賊於饒陽之張岡 張總愚竄河間陷獻縣踞之邊馬擾及交河富莊驛 二月初四日左宗棠師次定州疏陳方畧

云臣維捻匪慣技在飄忽馳騁避實乘虛始猶馬步夾雜近則掠馬最多卽步賊亦均乘馬臨陣則步賊下馬挺矛攢刺而騎賊分抄官軍之後其乘官軍也每在出隊收隊行路未及成列之時遇官軍堅不可撼則望風遠引瞬息數十里俟官軍追及則又盤折回旋以疲我其欲東也必先西趨其欲北也必先南下多方以誤我賊馬而我步賊輕捷而我重贅賊恣掠而馳官軍必待糧而走賊專用長矛官軍則必兼用鎗礮賊之輜重少官軍之輜重多故賊速而官軍遲尾追之戰多迎頭之戰少盤繞之日多相持之日少也現在諸賊妄圖北犯暫無南竄之意直隸地勢平行無岡阜塘濬足限戎馬主客各將領與劇賊周

旋日久非不思迅與驅除早圖蒞役也而局勢固有難焉者賊蹤現距京畿不過三百餘里官軍南趨賊必北向追官軍折而北趨慮將又落賊後一也現在諸軍均幸已繞至賊北矣然賊由東南而西北諸軍盡馳而西賊由西南而東北諸軍又將盡馳而東無論往返奔馳兵力必漸形勞憊且恐官軍併聚一方狂寇有時或乘虛肆逞終遂其北犯之計二也劉松山郭寶昌喜昌與臣書均以此爲慮必於近京之地設立重防然後放心向南縱擊臣維畿內西南路以涿州爲總要南路以固安爲總要茲值各軍雲集應請

欽派橫健將領率勁旅兩支一駐涿州一駐固安責令嚴防以

重形勢此爲近防之軍卽賊蹤稍遠亦未可遽撤也保定河間
天津三郡鼎峙保定距河間近而天津距河間稍遠現有重兵
在河間如天津有警尙可橫出截之然三郡屏蔽畿郊防軍尙
涉空虛必多罅隙此爲且防且剿之軍須隨時調度不可併聚
一方亦不可悉數南下也其進剿之軍則視賊所向併力攻剿
如將逆賊逼過滹沱河則與山東河南諸軍共收夾擊之效如
賊出而北則與保定河間天津諸軍共收夾擊之效較之專防
而不能剿專剿而無以爲防者稍覺周妥疏入

報可 劉松山郭寶昌敗賊於獻縣商家林張總愚竄深州

詔恭親王會同神機營王大臣辦理巡防事務 前任戶部侍

郎李鴻藻奏請派親王爲大將軍左宗棠李鴻章爲參贊

上諭現在各路統兵大臣並各省督撫帶兵入直剿辦捻匪雖經派令左宗棠總統前敵各軍仍恐各大臣等意見紛歧事權未一以致呼應不靈特諭各路統兵大臣並該督撫等均歸恭親王等節制惟軍情變幻靡常一切進止機宜仍應責成各該大臣等隨時相度辦理不得專候神機營指示俾免稽遲貽誤左宗棠李鴻章均係欽差大臣現既歸恭親王等節制自可一事權而免紛歧所請欽派大將軍參贊等名目均毋庸議 恭親王奏請陳國瑞歸神機營調遣奉

旨侍衛陳國瑞卽作爲神機營管帶官 左宗棠至保定督師

初十日劉松山郭寶昌敗賊於深州窩鋪頭賊向西南逃竄松山乘勢截剿攻破傍城賊巢十餘處張總愚冒死返撲適郭寶昌攻破五台子率師來會賊勢不支喜昌復攻破馬隆莊殺賊三百餘名 十二日劉松山郭寶昌喜昌敗賊於博野賊竄安平 十六日郭松林楊鼎勳敗賊於安平賊首張志清劉琅夏以仁領數百騎降 劉松山郭寶昌會豫軍張曜宋慶擊賊於深澤敗之松山等訓知賊蹤麇聚深澤之西華集緘約宋慶張曜山北而南松山寶昌喜昌由西北向東南直逼西華集宋慶等分隊抄出村後賊駭而奔悉將賊踞村莊奪回松山聞東面礮聲知宋慶等已接仗催軍亟進賊被馬隊截斷不及竄遁

擒殲無數餘賊折向東北而逸 十七日李鴻章至景州督師

劉松山郭寶昌張曜宋慶程文炳郭松林楊鼎勳會於饒陽
十八日劉松山等敗賊於饒陽城北賊由獻縣武邑竄深州留
楚鎮 郭寶昌敗賊於孔家莊轟斃賊目張和尚張五孩 二
十二日郭寶昌敗賊於封家村 二十三日張總愚竄肅甯楊
鳳元擊走之程文炳追及於博野斃賊目方黑兒救出難民數
千人 二十四日程文炳敗賊於深澤之梁村

上諭此次左宗棠李鴻章所派各軍均能奮勇剿賊和衷協力
迭獲勝仗具見該大臣等力顧大局共矢公忠洵堪嘉尚卽著
乘此聲威迅奏膚功同膺懋賞 二十五日張總愚渡滹沱河

劉松山等躡擊敗之總愚因官軍追擊由晉州西南之桃園相
古庄高堂新庄趙園樓上等村鳧水竄渡松山偕郭寶昌喜昌
宋慶張曜追至河干賊之未渡者殲焉 二十八日左宗棠移
駐定州 三十日左宗棠移駐正定府 三月初一日張總愚
渡漳河竄入河南彰德府 初六日張曜宋慶追賊至清化賊
方伐竹爲矛見官軍至棄竹而遁 初九日劉松山郭寶昌敗
賊於封邱之謝店岳寨 初十日左宗棠移駐彰德府李鴻章
移駐大名府 程文炳敗賊於封邱之白台染谷 十二日張
曜宋慶敗賊於滑縣之吳村 十三日左宗棠移駐大名府
李鴻章移駐開州 劉松山宋慶等擊賊於滑縣封邱之交敗

之 十八日劉松山郭寶昌敗賊於陽武之延州寨 二十日
左宗棠移駐湯陰 唐仁廉擊賊於滑縣敗績提督陳振邦死
之 二十一日左宗棠親督喜昌馬德順等擊賊於滑縣之五
隆渡敗之 二十三日張總愚竄南樂清豐周盛傳吳長慶敗
之於陶保村賊連夜竄莘縣 二十五日張總愚竄東昌溫德
勒克西等追擊敗之 二十八日郭松林楊鼎勳潘鼎新等敗
賊於茌平擒捻日賈託張有得及老捻數十人張總愚竄徒駭
河遂由平原竄陵縣吳橋 四月初一日張總愚乘雨趨東光
將偷渡運河追軍躡及之乃回竄余家莊初二日追軍至南皮
賊酋鄧保正率二百餘騎來降 初三日潘鼎新郭松林楊鼎

勦敗賊於滄州 初四日左宗棠軍次德州 張總愚竄靜海
追軍由唐官屯呂官屯至陳官屯楊鼎勦乘夜襲擊賊目何祿
誠率七百餘騎來降 初五日張總愚竄天津潘鼎新郭松林
等躡及之 初六日左宗棠移駐連鎮 初七日張總愚竄靜
海 十二日李鴻章移駐德州時左宗棠檄劉松山張曜宋慶
喜昌春壽各軍由東光南皮循運西節節截勦丁寶楨亦督軍
由運西繼進鴻章慮德州以下空虛故督隊移駐之 十一日
張總愚由鹽山竄山東擾及陽信海豐一帶楊鼎勦潘鼎新分
駐靜海滄州劉松山張曜宋慶由武定追賊及於商河敗之
丁寶楨率王心安郭松林馳赴東昌防勦 十四日左宗棠軍

次吳橋

上諭恭親王奏嚴定勦賊限期一摺逆騎數月以來疊擾直東豫三省奔突數千里來往自如官軍十餘萬人不能遏其竄越各將領彼此觀望粉飾戰功並有縱勇擾民致百姓戕殺弁兵之事若再日久遷延農民耕作失期恐又別生他變且入夏以後田禾日長賊騎到處潛伏進勦更形棘手賊股現竄海隅正可乘此機會三面圍蹙就地殄除著左宗棠李鴻章等迅督前敵諸軍步步圍道合力同心認真勦辦限於一月內將此股賊匪全數殲滅倘能於限內告竣所有出力各將領定必破格施恩優加懋賞如再遷延誤事亦必當重治其罪 十八日劉松

山喜昌張曜朱慶等敗賊於平原 二十日左宗棠督軍敗賊於寧津 二十二日善慶等敗賊於減河 二十三日左宗棠軍次鹽山時崇厚疏請江蘇派輪船赴天津巡防奉

旨著曾國藩丁日昌將上海捕盜輪船星駛來津交崇厚派令巡查海口 公覆疏云臣恭奉

諭旨卽經轉飭蘇松太道應寶時遵辦旋據該道稟稱上海捕盜局內僅有天平鐵皮輪船兩號其鐵皮一號船身本屬短小不過於內洋及長江等處護餉捕盜而不能行駛外洋現因損壞拆修告竣尙需時日至天平輪船從前曾至天津惟船身亦漸舛朽檣爐屢經挖補故今春護漕僅在山東洋面以南不敢

駛赴北洋緣石島以北風浪迥異萬一中途竟有疎虞徒失
捕盜之船而於洋防仍無實濟正在籌畫間適前署福建藩司
周開錫因採辦米石來滬該道與之論及此事周開錫以閩局
之華福寶輪船現在上海可以移用該船均係中國管駕並無
洋人在內惟礮械水勇不甚全備現添配開花礮六尊洋鎗一
百桿趕雇水勇五十名卽飭委員督帶北上聽候調遣該船所
需煤炭人工抵津後應由三口通商大臣核給等語先後具稟
前來臣等伏查蘇省輪船現既不適用於閩省輪船自可移
緩就急該前司周開錫等不分畛域通融移用理合覆陳 時
劉銘傳因病回籍假期已滿

朝旨飭公催令啟行 公覆疏云臣接

旨後卽專弁齎函乘坐輪船由上海至裕溪口登陸馳赴合肥
催令啟行臣查上年秋冬運河之守任枉之戮其謀皆自劉銘
傳發之而勞苦疲乏亦惟銘軍獨甚是以九十月間卽與李鴻
章訂約一俟東捻就平便當回籍調理厥後剿滅任賴股匪準
行請假馳歸以踐前約其時張總愚一股業已渡黃竄晉李鴻
章欲強留劉銘傳同剿西股不令回籍劉銘傳怨李鴻章忽背
前約心中頓懷鬱鬱其實李鴻章背約之故係因西股已入直
隸不能不改變前說該提督到籍一月之後李鴻章疊次專弁
持函催促臣與丁日昌亦馳函懇切催之又因病體未愈不耐

鞍馬尙未啟行此次該提督自必迅速就道惟念張逆縱橫畿輔將近半年各軍均極疲乏若非去年先滅任賴一股大局不堪設想劉銘傳既有偉績於前又將策成效於後銘軍應需餉項自當設法籌給以期迅奏膚功 山東巡撫丁寶楨安徽巡撫英翰會於東昌議分守運河之策自臨清至魏家灣六十餘里皖軍駐防自魏家灣至東昌府南七十餘里東軍駐防自東昌府南至張秋九十餘里淮軍駐防諸軍分段修牆 二十五日張總愚由平原高唐竄清平博平距運河僅數十里值黃水入運諸軍復嚴陣以待賊復折竄東南 二十五日左宗棠回駐吳橋 二十八日東軍王正起莫組紳敗賊於荏平賊竄禹

城平原 二十九日丁寶楨英翰會淮軍郭松林修築隄牆成
分軍駐守之 閏四月初四日劉松山張曜追賊於李家村
初六日劉松山等敗賊於慶雲縣 初七日劉松山張曜追賊
至滄州捻首高老步韓錦生周老鳳率數百人降 初八日張
總愚由泊頭下口撲運河劉松山與水師丁長春夾擊走之賊
竄連鎮吳橋聞左宗棠駐軍扼守折竄平原高唐在平一帶
陳國瑞連敗賊於在平高唐博平等處

上諭前因捻逆竄擾直東定限一月內剿辦淨盡現在限期已
滿賊股尙未蕩平左宗棠李鴻章交部嚴加議處都興阿著管
理神機營事務授爲欽差大臣督帶壽春馬隊並張曜宋慶陳

國瑞步隊前赴直東一帶會同左宗棠李鴻章剿賊 二十三日張總愚竄武定府二十四日竄海豐陳國瑞等追擊敗之 二十七日王心安敗賊於甯津 五月左宗棠督軍擊賊於鹽山海豐大敗之初宗棠令劉松山郭寶昌等暫憩運東甫數日聞賊騎復近海豐卽與喜昌所部富珠哩訥蘇肯議向鹽山橫出截之初十日至鹽山西南四十里偵賊在縣之東南折向正北行百二十里抵李家莊松山令軍士暫憩作炊三鼓銜枚疾進昧爽抵賊踞之游家莊分步軍爲四路居中馬隊張兩翼隨之賊見官軍三面掩至倉卒列隊官軍急起擊之各村踞賊聞鎗礮聲緊紛紛吹角齊隊富珠哩訥蘇肯率馬隊分路蹙之賊

不及成列向東南收竄我軍追至海豐之新集前阻一港折而北走松山扼之於小山忽大雨如注賊竄踞鹽山之丁村避雨方拋械而息散漫無紀我軍猝至截賊爲數段斬馘無算十一日松山追賊至滄州之張三村賊以騎隊回拒松山寶昌開放連環鎗礮賊跨馬放逸適張曜宋慶自南來追擊又大敗之其右路之賊由南皮東光竄至黎家集距連鎮二十里宗棠遣軍追擊賊一日夜行二百里由寧津竄入山東之德平與前段合併遂趨奔陵縣臨邑一帶先是李鴻章遣郭松林潘鼎新周盛波王心安等自臨邑陵縣聯紮濠牆至恩縣德州境與馬頰河民圩相接空出西南黃河濱百里以餌賊十四日宋慶張曜

追至臨邑賊竄濟陽十五日賊由濟境折回東北鴻章度賊不肯深入遣各軍分路兜剿令張曜宋慶趙武定二十日郭松林潘鼎新周盛波王心安等築牆工竣留兵長牆適中處以資防護鴻章遣周盛波周盛傳進駐吳橋寧津防賊回竄二十二日賊竄海豐二十四日張曜宋慶遇賊於濱州白家橋我軍分投迎剿披靡狂奔追二十餘里賊乘我軍覓水時以二三千騎來撲宋慶張曜率大隊截賊爲兩段斃賊二百餘人賊竄陽信二十四日郭松林王心安追賊至樂陵賊由陽信奔海豐二十五日郭松林唐仁廉春壽追擊敗之二十七日賊由樂陵繞出甯津吳橋間西南馳百五十里至毛家莊周盛波邀擊之賊由陵

德交界之劉家莊向西南竄踞德州之楊丁莊方家莊一帶是日劉松山郭運昌富珠哩訥蘇肯截賊南皮之砥橋甯津之耿家同三寶店連破之左宗棠由連鎮追至陵縣升岡鎮搜捕逸賊多名二十八日左宗棠軍與郭松林馬步相繼追賊各有禽獲三十日郭松林王心安敗賊於商河惠民等處是役也我軍自十四日追剿歷十六晝夜迄未休息斬馘無算賊勢益不支矣 六月初四日張總愚竄武定杜家橋渡徒駭河郭松林緊蹙之賊竄濱州李子鎮圍攻民寨松林擊走之 初七日郭松林潘鼎新敗賊於沙河時連日大雨松林等冒雨潛師乘其不備兩軍排列並進行十餘里甫過沙河賊隊未齊不虞我軍之

突至也松林截其前鼎新抄其後泥淖載塗賊騎難於馳突拚
命死拒我軍環回迭進鎗子如雨賊大潰挫追三十餘里至商
河城下遇袁保恆馬哨截擊之擒斬三十餘人沿途敗賊竄匿
秫叢中樹林間遺棄騾馬無數其大股脫逃者約尙五千餘騎
提督胡良作潘國揚均受重傷是役也陣斬鎗斃約二三千人
生擒千餘名張總愚中鎗落馬數十騎翼之而逃 劉松山等
擊賊於甯津吳橋等處連破之初劉松山駐軍甯津東北訥知
賊踞商河武定一帶誘官軍畢集東面將驀竄運西左宗棠度
賊東迫大海北阻減河斷無自趨絕路之理飭松山暫駐甯津
確視賊向初四日黃河盛漲初五六日海豐霑化大雨平陸咸

以賊由武定迤南向商河竄走松山等爲積水所阻不能進擊
初九日偵賊蹤在臨邑陳家圩及濟陽白菜窪一帶時張曜宋
慶駢臨邑東南四十里之下溝郭松林駢臨邑東南十餘里十
五夜賊竄甯津西南二十餘里孫家集趙家莊尙家莊一帶劉
松山令軍士疾進避淖而行直搗中堅富珠哩訥蘇肯等從兩
旁而進正追殺間賊目張大福洪順林率七百餘騎來降劉松
山受之十六日由甯津追至吳橋縣東北斃賊一千三四百名
生擒六百餘名賊目江天耀等來降適郭運昌亦降賊目張鳳
超等於是賊目魯克桂周六焦仲皆降 十九日張得勝程文
炳敗賊於商河殺賊二百餘名收降百餘人賊折走東北適袁

保恆帶小隊進駐德平義渡口獲騎賊數十人訊稱張總愚所部頭目大半投降僅賸張宗道張宗先等兄弟相隨時黃水盛漲灌入運河德州東光南皮境內東岸衝缺三處運水分由平地漫溢入海賊騎限阻不得過日就衰滅矣 二十日劉松山連破賊於鹽山滄州等處賊目周祿帶二百餘騎來降 先是公檄長江提督黃翼升偕淮揚總兵歐陽利見漕標記名提督姚廣武各督所部炮船由張秋乘漲進口駛入德州運河防務益固而徒駭等河水勢日盛濟陽一帶平地水深二三尺於是李鴻章與翼長袁保恆等商定會合豫東皖軍由徒駭河北岸鳧渡而前蹙之水濱爲一鼓聚殲之計時劉銘傳屢奉

廷旨敦促力疾就道是月初八日抵東昌老管問各軍屢捷賊將就滅不肯讓功邀賞因赴德州謁鴻章力辭兵事鴻章慰勉檄令統率舊部赴前敵督戰乃強起視師二十八日劉銘傳郭松林擊賊於徒駭河大破之僞小閻王張總愚溺水死初張總愚被湘軍擊敗竄德平郭松林潘鼎新陳國瑞張得勝等分路兜追二十二日諸軍會於商河二十三日張總愚涉水向西南逃竄二十四日竄高唐二十五日潘鼎新追百二十里至高唐賊向博平清平一帶圖撲運河時東昌臨清張秋間河水深又馬頰河黃水漫入各營嚴守賊不敢近二十六日郭松林劉銘傳追賊至高唐賊向西南竄走二十七日由博平向東昌迤

南竄撲河牆經守軍擊退銘傳等議於徒駭河沿河橋口紮住銘傳由桃橋守至南鎮松林由桃橋守至博平袁保恆宋慶張曜由博平守至東昌將賊圍在徒駭河黃運之間二十八日早賊由西向東回竄銘傳調集馬步迎擊該逆且戰且走追剿數里值松林東來馬步全軍攔住去路又兼河道分歧水溜泥濘銘傳松林兩軍馬隊五六千人縱橫合擊大股賊匪全數擒斬張總愚僅帶數十騎北逃馬勇追上賊棄馬遁入高粱叢中張總愚投水淹斃其子張葵兒被官軍擒獲總愚姪張正江率數十騎逃至南鎮銘傳派駱國忠堵住擒老賊三四千人馮數奪獲善慶溫德勒克西追殺餘匪淨盡西擒平

上諭捻逆自倡亂東南十有餘年竄擾數省生民受其荼毒神人共憤罪惡貫盈本年正月間逆首張總愚復糾合匪衆肆擾河南山西直隸窺伺近畿經官文英翰丁寶楨李鶴年督兵防勦並經左宗棠統軍追擊朝廷復調李鴻章赴直東一帶督剿以收衆志成城之效現在蕩平捻逆並將餘匪搜捕淨盡具見該大臣督撫等協力同心膚公克奏已賞還李鴻章雙眼花翎騎都尉世職黃馬褂並開復處分及左宗棠等降革處分均予開復自應分別再沛恩施以昭懋賞李鴻章著賞加太子太保銜並以湖廣總督協辦大學士左宗棠著賞加太子太保銜並交部照一等軍功議敘丁寶楨英翰均著賞加太子少保銜並

交部照一等軍功議敘李鶴年著賞戴花翎並交部照一等軍功議敘崇厚當捻逆攻撲天津時督率兵勇紳團共保郡城並籌給各營糧石餉需源源不絕實屬著有勞績崇厚著賞加太子少保銜頭品頂戴並賞戴雙眼花翎兩江總督曾國藩籌辦淮軍後路糧餉軍火俾李鴻章等克竟全功著交部從優議敘署直隸總督大學士官文前在湖廣總督任內暨本年捻匪竄直時均因會剿不力疊經降旨懲處此次捻股悉平著加恩開復太子太保銜暨剿捻不力革職留任處分並賞還雙眼花翎以示錫爵酬庸用彰慶賞至意

求闕齋弟子記卷十三